

四庫全書

集部

欽定四庫全書

景文集卷三十六

宋 宋祁 撰

表

定太常寺進案到鐘磬一部表

臣聞鳧氏之為鐘也已厚則石已薄則播故以弁侈之
量齊焉磬氏之為磬也上則磨其旁下則磨其端故以
清濁之法制焉是則器先利而音調民已和而樂應禮

著夏歌者實先於人奏詩次商頌者本依於磬聲然後
奮豫歸情統同布度盡韶之美黜武之慙諧下管以九
成絢崇牙而四合聖期累盛至範交修恭惟皇帝陛下
攷古立均披圖迎律大猷翕作韶象嘉成推至樂以求
音本乎在治顧攸司之合奏容有失傳所屬以聞發中
垂可特頌明命俾攷正聲臣等共率愬冥仰祇惟擇昧
阮咸識微之妙非文收調啞之能淹久日時咨求典故
方且校堵肆之全缺參宮羽之重輕或鑿其銑樂均疾

舒之所在或鑱其鼓股取擊拊之有宜曩惟周臣肇營
律準張絃列位代管還宮居有雅音取為定法今已攷
齊鐘磬一部與律準之聲悉無差異七均有叙九變告
和詘然能終純如可縱惟夫金有大定之德石無可轉
之文苟二器應以克諧則八音受而為度上符丕律有
煥懿綱竊惟真聖之朝已嘗脩正雅樂舊章故在年所
聿遷遺我成規以啓淳烈況今穆清多裕聰覽餘聞幸
得樹羽充庭瞭人肄業慮治音之有誤丐善聽之所裁

庶使靡靡遺聲不容于五降悖悖王度來格于三神永示方來以矜能述臣等無任首循干冒激切屏營之至其鐘磬謹隨表上進以聞

進藉田頌表

臣某言臣聞王者必藉千畝庸勸九農載御耜于介閭賑陽膏于廛左借民之力時闢于甫田為神之倉歲儲于馨稷睿明在御容典交修茂遵文祖之規遂庀陽官之舊恭惟皇帝陛下菲衣訓儉重穀教人乘春官之載

陽按大田而惟正追循先烈祇展上儀綴萬騎于中營
抗九旗于先道農祠訖享神甸就耕服黛耜以天臨紆
朱絃而聲勸本宜一撥遂遏九推揭丕律以自新冠前
王而絕擬自昔車牛馬耦僅出偏方鉤盾弄田罔稽正
典訂茲之盛曷擬于倫臣陪列祠宮宿官道室竊興感
禮敢廢徒歌願因風土之餘音少識樵蘇之談道謹夙
夜齋沐撰耜田頌一首于瀆宸宸

賀乾元節表五首

按仁宗本紀帝生日為
乾元節在四月十四日

臣某言伏以金魄就盈龍杓建己紀為誕節允煥休辰
盡日月之照臨祝乾坤之悠永恭惟皇帝陛下膺符受
錄出震體元乘火運以興王生正陽之令月體萬物之
長治三光之庭俗樂成康刑措文景梯山航海咸知中
國之聖人就日望雲悉禱後天之遐筭臣滯守邊圉徒
詠聖辰阻奉萬年之觴但極雙鳥兕之躍

臣某言伏以夏序始交月靈幾望儼明堂之朱戟式煥
帝容紀華渚之流虹用標聖旦恭惟皇帝陛下茂熙至

教通駿光猷孜孜厥心則九功並叙烝烝其孝則四極
爰臻混車書而極和塞天淵而浸福那歟之盛尚矣罕
偕屬千載之應期固萬靈之輸貺誕彌有始延祝同寅
九賓在庭殊鄰拭玉如山之委擁漢瑞而勿休侔天之
剛冠義圖而彌永臣離邦未幾荷寵最深但傾景于葵
園阻稱觴于冀祀

臣某言伏以帝出紀乎震方聖生符於里社揭為亨會
以懷洪休歷古為儀迺今尤盛惟長羸幾望之旦實丕

后殿生之辰嘉序標名歡聲綿宇恭惟皇帝陛下奉承
基構精厲憲章嘉祐順乎天時羣生庇于上德飭躬必
儉令下弭奢侈之端禦戎以和納民于仁壽之地化孚
無外恩浹有知每電樞之及期徇露囊而飾典大為和
會廣給宴邀搢笏相趨交修于鉅禮呼嵩為壽均祝于
無疆慶運有華萬靈胥抃臣向陪近列今退思闕苦鑒
跡之不良隔班綏之序進姑勤丹悃永固熙圖

臣某言伏以夏簫啟和辰躔幾望本聖生之初旦著天

會之昌期令節垂鴻縣區交慶恭惟皇帝陛下丕承寶
序駿惠先猷萬靈接手馨香羣氓舍于仁壽撫不羈之
服未始加兵獻又新之銘居常待旦化含無外恩激有
知每屬電樞之辰胥并露囊之舊大披路寢普見羣臣
執玉奉觴罄歡心而如一後天絙月續景算以無垠震
動休符昭明鉅禮臣向陪禁闥今滯侯藩溯昕景之鴻
階隔王官之鳧藻姑勤抒祝永固熙隆

臣某言伏以帝出紀乎震方聖生符於里社揭為亨會

識乃洪休惟丕后克生之辰當正陽幾望之旦萬靈輸
祉九寓祝延恭惟皇帝陛下膺赤伏之祥據綠圖之會
天付所覆罔有不臣世貽厥謀用侈斯慶掩刑書以綏
措歛威械而就橐物無天傷俗致仁壽謝生靡所名德
無階是用企電樞之期相與徇露囊之典式披瓊館或
叩金祠括輿地以授誠後璇穹而歸老呼韓薦幣夷獠
奉珍雖舊而新常茂居安之業俾萬斯億永膺昌大之
期臣久服內聯今乘遙候溯君臣之萬里隔觴會之九

行姑朶昌辰內翹歡素

正旦賀皇太后表

臣某言伏以上朔攸開微陽肇布時月冀而頌厯旅星
柏以陳觴恭惟皇太后陛下教本至柔道孚俾熾贊天
元而布度包坤順以蒙禧方屆端辰彌昭景祐臣違顏
左城假節東侯阻陪觀象之趨但結干旌之思

長寧節賀表

按仁宗本紀聖天二年正月
以皇太后生日為長寧節

臣某言伏以玉燭開年協風播序寶月上弦之始祥沙

啟繇之辰著令有嚴多儀云備恭惟皇太后陛下秉文
駿惠襲道至冲擎百度之樞用孚有極慎五刑之誥乃
統至慈皇矣而荷帝觀隕然而示坤簡屬茲善旦爰紀
聖期訂千秋之舊章擁三靈之丕祉當陽稱壽于以教
孝于人列辟相趨于以後天之算并包無外蒙被大禧
臣久濫通行近分優寄睇日升而增禱參鰲并以無階
賀壽星見表

秋分謹候旦見為常惟明潤之成文告壽耆之介貺允

丁至治正應祥躔恭惟皇帝陛下駿惠先猷寵綏庶物
敦仁而用錫爾極深拱而罔測其名訢合三靈震動殊
祉爛焉南極之宿載于太史之占視孤之前路內而出
騰華緯表鐸景天垂繫見象之甚明屬攸司之奔告聖期
開賜諒增千萬之遐皇格重雍方闡一平之盛仍答良簡
俾獲信書臣等親違嘉辰榮觀美瑞內循歡悃實倍常情

賀冬節表

臣某言伏以寶典綏長盛儀杓亞步璧珠而聯景挺云

荔以參萌恭惟皇帝陛下執競是皇纂圖惟大澹冲猷
于克屋懿新德于湯盤協氣順躋慶辰昭會方薦恭而
飲燎式擁瑞以如山臣遜守五符阻陪萬玉注遐情于
望鵠美餘抃于歡鼇距陌于茲選言非喻

賀生皇子表

案皇子即鄂王臧時係
慶厯元年和在壽州上

寶祚叢休天支毓秀慶騰祕禁歡溢中區恭惟皇帝陛
下受命溥將凝圖丕赫權綱相乂振乎克念之虞簡素
所安表于不勉之懿且復欽刑薄賦重穀弛政一方少

饑則急馳使節方金稍乏則輒續禁錢民用靖嘉神罔
恫怨是以上帝歆佑三后顧存詒美孫謀昭衍無疆之
烈歸功元首茂啓多男之象誕協仲商挺生哲嗣星弧
具禮天第交華惟翕闢之儲英固覃訏而絕異眇聆詔
諭並仰獻儀薦笏相趨抃吾君之有子珪璋流愛宜天
下之繫心臣始去近聯遽承吉語賡歌輟然早知周德
之遐參祝祠禱罔逮漢臣之幸

賀南郊禮畢表

按仁宗本紀慶曆元年十一月
祀天地于圜丘是時祁在壽州

臣某言今日日馬遲到救書一道以南郊禮畢大赦天下臣當時集本州官吏軍民宣讀并下管內諸縣寨施行訖者帝儀訖饗朝渙推慈飛驛疾傳庶邦叢慶竊以天郊之重國制有常凡萬乘躬行必三歲間性不煩不怠由列聖而持循以妥以虔合諸神而裒對睿圖累盛縟典勤修恭惟皇帝陛下纂大合華溉中布度抵金壁之玩率儉示人收霜電之嚴措刑於下克勵明德格于皇穹交熏太和冒我羣品顧懷時億瑞應日來亟藏上

儀若祗舊典戒期百執頌詔九州曳雲罕之常羊服翠
蚪之半漢殊庭一獻清祐徧躋遂自陽靈之宮往會天
元之旦羽旄四合垓陞參登上壁左琮之華合祛而信
祝祖範宗題之次更侑而迭嘗拜嘉祚于席垂烈欽柴
于靈表雲心合答熙典備成然後還坐中天之闡普肆
隨風之澤改頌大號崇冠初元昭神之祥祈命惟永賞
功赦罪已責逮瘼咸與惟新牖民衷而遷善聿懷多福
導帝祉以縣區盛際有光彞倫咸賴臣嚮觀舊史彈見

往朝或不愛牲玉為恭殊非明薦或所過租賦為復蓋
出重勞語昔罕全訂今絕擬所恨清塵在望自苦周南
之留紫橐仍持不與甘泉之從第班恩諭均決歡悰

定州賀南郊禮畢表

案仁宗本紀係
皇祐五年事

臣某言今月八日馬遞到敕書一道以南郊禮畢大赦
天下者臣當時集本州官吏軍民宣讀并下管內諸縣
寨施行訖嚴燎煬薰翠輿旋軫慶騰觀魏歡決黎苗竊
惟報本以誠莫尊饗帝就陽而祀是謂因天有國以來

三歲為法合萬靈而服享窮四海以職來乘茲治平用
舉能事恭惟皇帝陛下丕承正統奄治中區惟古與稽
有典咸秩既揚謨萬物乃嘉享三神前會諸儒討定新
樂俄頒制詔悉侑聖真謂周以後稷祀郊祖而忘考唐
引睿宗配地親而未尊參對上神自我為古推處犬孝
卓冠彝倫爰卜景至之初克申躬見之禮三后居左自
外止則匹行兩儀位中由天明則地察蠱豆惟旅簫石
告諧被馨德于神衷委純祺于霄極萬乘淵默百禮休

成茂對剛辰用肆大青揭日破葑注海濯癰累係有更
生之歡廢錮得自新之路賞幣丘垤屯旅藻鳧歡驛疾
馳不崇朝而徧羣心保合置天下于安臣適護窮邊阻
觀鉅典惟軍旅而未之學久塵攝師之行知鬼神之所
以然方隔受釐之間姑宣上德明諭遐毗

賀日蝕日降雨表

案仁宗本紀至和元年朔日
庚午日有食之或祁在定州因

雨不
見耳

臣某言臣所治定州并轄下州軍去三月二十九日雲

氣晦暗至今月二日午鼓降雨盡酉刻未止及尺以上
屬縣告足臣伏尋近降德音以有司言朔日日當食有
詔避正殿輟膳改元示天下自新引咎太切三靈震動
重陰蔽霄日景不見夫不見者與不食同臣誠喜誠抃
頓首頓首伏惟皇帝陛下纂成四葉憂勞萬方日月祗
惕罔有懈忽辰晷回薄大抵有常今近推變異厚自克
責天監在順神佑者謙感無旋旦轉禍為福前此六月
不雨麥禾枯悴及茲滂沛遂冀有年天完太陽地茂多

稼君道尊安旱災訖息敵使在道親覲感應震畏盛德
抑伏奸謀上推古昔無今倫比臣乘邊在遠不獲與羣
臣稱慶闕下謹奉表陳賀以聞

定州賀聖體康復表

按仁宗本紀係
嘉祐元年事

臣某言今月八日得進奏院狀報聖體康復已于二月
二十三日御延和殿親見羣臣者六氣順宣偶愆常裕
萬祉交薦施舍太和便坐天臨別辟鳧藻恭惟皇帝陛下
下躬甚盛之德繼下武之期悉攬權綱罔憚宵仄百度

已治舉器而置於安一物未宜無災而為之懼聽斷逾
勵頤攝稍愆仙劑暫嘗客疹俄解前頒曠蕩之澤邇會
清明之朝帝祐神扶陽熙玉色勤在謀始雖有強不息
之勞福及報成方介萬斯年之享均乾宏冒與日長躋
臣忝服近班欣聆吉語且念處無為者當簡于事謂冲
用者莫嗇于神望畧繁期永光丕祚

代中書乞降御製詩付編修所表

伏以國有大事所以訓恭帝庸作歌是稱威德況且鋪

茶天耜頌嘆慈闈宜首信書以傳不朽恭惟皇帝陛下
勤宣衆甫祇建大中澤浸有生誼柔絕黨遵端拱之舊
惟永樂之尊教必有先爰勸農而勸穡古由我作不愛
禮以奉親誠動天淵聲震金石因紆寶袞申述盛容據
體要以成文包猗那而同美臣工廣和方夏敷聞華日
月以照回被風雲而翔舞臣等職當細績親覲文思聖
典不昭攸司任咎是敢仰祈副簡垂錫書筵揭為大猷
俾永鴻烈布之天下遂抗于堯言臧在名山永光于漢

策其御製耜田禮畢及覲皇太后恭謝太廟詩共二章
伏乞降本付外編修

代進新稻雙竹詩表

伏以層城仙籙順動于王游區稻町篁紛函於天施仰
趨中召與覲嘉生奉衛飲以屬厭激蓬心而感發恭惟
皇帝陛下勤勞訓道閒豫凝神聯漢氏之離宮有周家
之靈囿特侔漈浸臨籍香滋務知五稼之艱式扈九農
之勸箭筠其成睢苑所珍強籜挺敷秀莖岐出本至仁

之普祀萃靈物以旋鋪警蹕紆行臣隣拭目樂崇丘之
允殖藹折俎以均施內荷帝慈竊惟天意一禾實穎準
歲取之且千衆節共芑示世支之維百臣等共慙禱昧
適遭亨嘉敢抒費詞少陳大德慶千齡之累歲維以遂
歌恩五降之容彈安能中雅方塵睟覽交集覲顏臣等
謹夙夜齋沐各課成親稼殿新稻儀鳳閣雙竹詩二章
干冒宸嚴臣等無任省循狂斐慙懼屏營之至其詩謹
繕寫隨狀上進以聞



景文集卷三十六

欽定四庫全書

景文集卷三十七

宋 宋祁 撰

表

謝改待制表

按本傳新次當知制誥以兄序方
參政乃除天章閣待制在寶元二

年十
一月

臣某言臣伏奉制命特授臣依舊充天章閣待制者命
發于中擢非其任懼先褒集感與愧參伏念臣早以忝

冥陶于文教在阿蒙育易仕代耕由薦牘以應條齒經
生而挾冊提給尚書之禮升直道家之山間屬成書亦
蒙進秩不挹漿而持斗舉畏叨名未司牧而逢祥居慚
何力仰含天造未委官刑猥濡墨于螭坳兼倖籌于鹽
筭清光在望更無咫尺之違至治丁辰時紀殊尤之事
內修幸會疇敢越思廼蒙皇帝陛下錄以爲徵記其狀
貌慎行獎數超寘邇僚弗緣左右之容特出顯印之眷
披霄延澍破部回光惟寶閣之神深祕珍圖之寶積創

為美秩庸疇惇儒寧茲僕邈之才可重清閒之地卑微
駮列辭控無從昔之待詔承明陪游金馬無聞定著尚
詫榮階詎比亨嘉之辰專為顧問之選第驚茲授偶值
無庸謹當佩訓自強飭躬思勉馳無泛駕雖千里之難
期益靡望天冀一心而論報倘施涓壻敢吝靡捐

謝賜金紫表

按表內有屬司容局云云當局
衫為待制判太常禮院時事

臣某言今月九日蒙恩改賜臣金紫者戒塗近對綬品
更華祇佩寵靈內深榮煥伏念臣行能無算孤拙自知

振鷺珍羣居慙遽羽太官美食遂嘆浮人久含臧疾之
慈未獲酬恩之所屬司容局面控感懷俄被句傳曲膺
蕃錫袍文染蒺魚飾垂金服不值庸忍斬于安吉力微
稽古貽望于儒先還縉無從光軀何幸斯蓋伏遇皇帝
陛下重顯常體蒙置過聯特假身章俾隆官等庶奉旌
如之賜並圖最爾之酬

壽州謝上任表

按本傳祁知壽州即在庠罷
參政之後為慶應元年六月

臣某言伏奉去歲六月十一日敕書差臣知壽州軍州

事兼管內勸農使即于今月七日到任禮上訖初違侍
橐出總州麾地控翰垣政兼民稷引章揆寵處閣知嚙
竊念臣本以孤身仰陶上教措詞簡斐少不名家投策
猥并遽叨著第用沿仕牒寢剝宸猷匪智也愚自知其
天分謂多而拙罔待于人言朝不汝瑕誼無過廢料于
未至靡有先容次補者六宮乃正臺郎之秩內遷者四
職遂玷從臣之聯朝夕參承歲時賁于親逢云幸平進
罕階故嘗晷昃忘餐夜分置寢算勞念得則微橫草萬

分之勤計過悟非則有坎墮一介之刺內訟左數寧舍
靡遑昧死聞陳乞邦自試書下丞相之府久已見俞筆
閣承明之庭茲焉獲達洪惟盛世慎擇長人申勗表乎
詔文共治形于宸嘆俯循極陋曷稱敷求此蓋皇帝陞
下善育人材勤恢教職謂屢經于策勵審一出於忠愚
特委細文俾臨善地況楚疇沃衍淮產夥豐潛聖作藩
國封攸啟元戎疏鎮帥節甚雄憬彼東南此實都會臣
敢不悉心庀務安節首公宣諭本朝之恩刺候斯民之

瘼冀逃諉事姑服羹箴但念夙侍軒墀未嘗去國自同
犬馬寧不戀君魂棲交戟之嚴心結觚稜之遽儻使賜
環仍在跼履終收則奉計來朝敢三年而殫遠省躬論
報雖九殞以猶生感惕自中涕洟橫集

謝書目成加階勲表

案晁氏讀書志崇文總目
于康定二年告成祁亦預

修同加階勲是年十一月改元慶歷康定二年即
慶歷元年表內有中請為邦語是祁時已出守壽

州
奚

臣某言月日進奏院遞到告敕書各一道將授臣朝散

大夫依前官加輕車都尉封賜如故臣放朝謝者祕錄
終篇鴻都第賞例霑徽數垂料餘勤授受交虛榮憂兩
萃竊以廣內之典中經所藏自四聖相承凡七紀而遠
積丘山而盡在糴朱紫以未分金匱深嚴牙籤叢舛攸
司傳失有詔部分疇簡名才總製都目體漢家之流略
概見所從參史氏之藝文種分必類討論既定統紀悉
周而僚輔他還纂修交集臣猥綠惜學俾預末行素自
慙冥動各典領雖片詞殘牒時竄左文且雜語諸家尚

悉全載訖數職中請為邦遂專刀筆之煩並忘緹油
之習不謂芸編卒業黼幄程文嘉衆籍之有條美諸儒
之競力因褒過列施及孤臣聯文散之近階賜朝勲之
優轉揆榮至渥撫已無堪閣筆居多早戢鍾繇之恨殺
青偕上敢叨劉向之功汗漫不收天高難訴但能銘于
肝膈或論報于涓埃愚疑不誣明神是質

謝加階并爵邑表

按仁宗本紀慶曆元年十月郊
祀加恩百官祁時在壽州

臣某言今日日進奏院遞到誥敕各一道特授臣朝請

大夫依前官仍封臨邑縣開國男食實封三百戶勲賜
如故者縉儀交展信賞第頒綠策從勲汎霑異數罔功
被貶尸寵蒙慙竊念臣本以孱羈誤膺識拔雲章之便
荷橐見收束帶而奉朝趨居常三省戴盆而仰天極決
匪兩能止竭撲愚以圖稱報寸勞未效公議遄興出屏
近藩尚通秘籍適會于郊之享爰修以職之虔法有侍
祠雖預甘泉之簿身方守土遂阻玉關之歸負結戀深
心馳魂震廼蒙皇帝陛下廣歆馨之福推舍爵之仁疇

庸以差均澤于下眷孤臣之補外助經入而有常錄此
餘勤沛為慶典進階越等啓土聲封聞命若驚修顏罔
寘且掃除奉引未始請行而於穆猗那無從抒嘆坐沐
光榮之集例承深潤之褒難拒大恩姑銘丹億儻云酬
之有所誓至殞以無忘

除陳州謝上任表

按續通鑑長編慶厯二年右僕射張耒以魚同詢奏于七月丁

亥判陳州九月甲申徙壽州
耒自陳徙壽故祁伯壽徙陳

臣某言月日進奏院遞到敕書一道就移臣知陳州軍

州事兼管內河堤勸農使許辭謝取便路疾速發赴本
任者睿慈垂濟羈僨見寬許停遠方俾守近屏拜命云
已感涕交沱臣即以今月九日還付故章假領新節恭
趣便道罔敢留行以二十五日到任禮上訖卷茲宛丘
陪過京邑譬周寰內均漢右扶氓俗敦龐閱盜稀簡臣
既與吏民相見即告以朝廷撫育之厚鄉縣期會之常
最屬情勤整比綱目況穀食豐賤間里阜安儻謹奉條
稍留考課雖臣庸賤保致靖嘉伏念臣比荷簡求擢在

親近業以狷直初無援私寵靈設如倫比驚媚臣亦知
險塗易躋孤枿難林尤避譏嫌居常寢默冷司閒局自
分歲時寸劄片文不干臺省冀緣謹敎弗累採收然飛
語無根狙黠潛擬倏違法從外典守麾倉卒去却靡違
自辯間闕居外誰肯為言而譖不亂聰昧果蒙照未踰
再褫俄及內遷幽莢賜萌朽骸蒙肉城闕在望頓比玉
關之歸傳瑞交華決非淮陽之薄抑臣又聞簪履至賤
所收本乎君德狗馬何預所戀在乎恩主物誠有之臣

可無似敢不勉懦為力既力而忠竭肝膽之愚塞分寸之責生年死日質聖誓神疏屏方虔造朝云阻躬留心企感悅叢并

上謝替赴闕表

案本傳初由陳州還知制誥時係慶歷三年

臣某月日都進奏院遞到敕書付臣為差宣徽南院使保靜軍節度使王德用判陳州令臣候交割訖發來赴闕者節音垂名詔底前頒弗棄而收釋憂為并拜恩匪次戢感無涯伏念臣本以空疎誤蒙記識課勞未驗竊

寵已華遂自史員入塵禁閣水淺舟膠勢必有然馭拙
吻傷理無容濟果煩正議將責罔功伏遇皇帝陛下廣
覆由天至慈如父謂樹立之始實出羈平雖進擢以來
不由黨援排訾損刻出憲回仁俾千石以出麾從萬分
而自贖甫踰年律特改近藩墜葉重春摧輶復載會須
輔鎮將授帥臣因得代還以圖收蓋聞命歡踊撫已震
慙且念叢爾孤生覲然去國長而多病衰不須年鬢雪
紛斑目花眩黑越在遐外積有流憂尚恐狗馬道窮先

填溝壑江漢天限無復朝宗敢期踦履之餘脩被召環
之賜光華下集首領生歸威靈改加殞越奚報但念九
閩在望十舍而還雖否運已傾決無終塞而清光可仰
敢俟駕行甫訖交符即當就道欣榮參會澁訥難宣

上謝知制誥表

按表云三月詔書乃慶厯三年之三月也是月蔡襄除知諫院祁有

待制詞見本集時祁年四十有七故云臣踰強仕者六年

臣某言伏奉三月壬寅詔書授臣依前官知制誥者有
命自中無階申讓怔忡即忝感懼交顏竊以星署嚴華

是司書贊帝猷粉澤專寄彥髦故言之簡煩視人之賢
否比綸而演如汗弗收絢日星而森垂薄天淵而充塞
號為咸選宜值難才伏念臣天畀以愚學陶所習本緣
薄技倫比諸生待罪文林薦紳朝笏預成六典見謂少
勤因得黥筆夾階注言於左史前籌倖府商利于縣官
會臣兄某越自禁局擢貳公府伏蒙皇帝陛下憐臣淹
久記臣樸忠方以避親尤難試可天語宣示台宰具聞
遽內交戟之深寶兼待詔之美此為異等絕駭常均遂

使羣議坐譴夸者陰媚得無忌克時浼聰謀部屋夜暗
觸太陽而銷散幽萌朽枿託厚地以兼容迭為二藩不
遠千里而賜環垂洎趨節生歸不圖誤恩復齒中禁荷
寵惟谷捫襟若醒且臣踰強仕者六年廢辭業者三歲
慮窮刀筆氣耗風波壯為病侵衰先老至任焉不稱謗
又將興矧今鸞鴻邁庭蘭蕙交畹檢之禹律絳以唐文
慶霄光明萬物丹采安可細事管蒯廁之色絲篴揚糝
糠先乃嘉穀撫孤生之匪次寧樂育之當然此蓋陛下

先置不能以來多士罔遺篤物庸示至仁策十駕之庸
驚班四戶之凝近上循感會俯視官箴敢不勉情為虔
拂昏于瞭浚明惟恪絜矩以須稍裨慎令之行冀免知
臣之諉臣無任循榮并遇感惕屏營之至

上謝轉吏部郎中表

按本傳不載此職又歷代名臣奏議有慶歷三年祁為尚

書禮部郎中知制誥上三路防邊七事本傳亦不載其職今按表內誤直禁嚴及直徇即臺之

進秋云云以總在知制誥之日未授龍圖直學士之前

臣某言伏奉制命特授臣尚書吏部郎中依前充職者

課容歲比官得例遷華秩誤躋愧襟罔措伏念臣本緣
羈遠誤直禁嚴病與生俱衰先年至間抱風波之悸實
依山藪之藏牽勉拙艱婆娑歲月攸箴未驗不職應誅
敢圖公府之署年直徇郎臺之進秩報聞既允付外遂
行拜獎綽以驚魂躡華塗而扞股此蓋皇帝陛下天無
擇覆春不檢和謂陟明之格普頒且宿業之勤必錄遂
容孤蹟亦被優除謹當澡雪而煩彰施厥采和羊腸而
叱度觸雞雨以長鳴苟昧是言有如茲日

上謝龍圖閣直學士表

按本傳祁以龍圖閣直學士知杭州留為翰林學士此

首與後一首皆
應石慶曆三年

臣某言今月四日閣門拜受官告敕牒各一道除臣龍圖閣直學士知杭州者層禁叨榮大邦蒙委恩叢非願愧溢乃情恭以聖考上文寶極胥構大開天策之蘊分置金匱之藏間召名儒入當清問因旋題之華構冠學士之美銜矧為峻資罔非崇東如臣者器資穉昧學術迂孱幸有親逢記無報稱四年待詔姑奉凝嚴之游兩

郡佩符不絰循良之目賜還過著俾演大言扞格哀矜
延綿宿疚胡廣不愆之舊動輒有志左史能讀之書舉
皆未學茲焉弗職況也自知適會要藩慎求缺守宰司
誤啓制詔聞俞既藉內于神深又節假其蕃翰誼非輕
外治實責成目見河圖遂過宣尼之願名留禁闥更無
汲黯之嗟斯蓋皇帝陛下續短于長勸能以否謂雖一
介自有鳴吠之專借曰萬分亦收涓埃之補庸加枚拭
垂逮末愚敢忘夙夜之恩以忝身修之永神而可質心

不難銘

上謝宣召入院表

右臣今月二十五日翰林書藝董皓至臣所居奉宣聖
旨召臣入院充學士者驛使猥臨天辭垂諭齒收單跡
引內禁林列讓靡從真顏無所竊惟凝密之署詰命所
司朝選慎其咨愈士類託乎清切非有羽產之懿嚴徐
之才曷以對揚過言傳為成訓衍膏潤於方夏鼓篳黃
于典謨是惟能賢足暴公議伏念臣懦寔素稟蹇拙衆

知偶緣彫篆之微久被菁莪之育新逢聖誘自力攸箴
有事素風遂安所習向從青簡之列越綴皁衣之聯縹
組為邦賜環上計八陪星掖祇演綿詞而扞格長年阨
勛槁質故疴新疹痊劇相尋淺學空文廢忘幾半問伏
蒲而自乞願剖竹以再麾遽沐俞恩仍遷近職天誘其
頤人及爾私方具扁舟徑趨守屏不謂玉堂任缺寶詔
中留還駭栗之飄危補持荷之空乏卻其訴避敦以恪
居旬歲內而三遷貫情涯而載惕此蓋皇帝陛下過循

虛譽降飭辱姿枉頌名節之華俾蹈高門之複斂躬圖
勉揆獎思酬誓以澡被蒙心繹求丕律體齊人之編棧
謹廸身修探義易之隨風慎裁憲令萬分可采九殞為
期

上謝兼侍讀學士表

按本傳祁捷審官院兼侍讀學士表內云自去歲收還郡符

是時當為

慶歷四年

臣某言伏奉今月十一日制命授臣兼侍讀學士者命
由中發職匪次加揆寵自循無顏容愧竊念臣天賦愚

樸地託羈單去歲中收還郡符引內自禁以多病之後
乘早衰之餘昏眸眩于臨文倦舌喏于論事而亮章煥
日漢律至天形過照而自窮馭已駟而必蹶方將免冠
頓首自劾曠僚託迹塵纓復從冗職何言大度併赦弗
聞遂令散木之流獲預複門之秘恭惟上德稽古至聖
多能當決事之少閒託不明而訪逮尤須練達上副咨
詢詎容孤生遽謬高選何以披文玉版摘句清廟覘師
尚父之書尊其為道觀太史氏之策知所以王匪曰值

才居然過聽此蓋皇帝陛下愛同芻狗冒若陽膏方詭
效于寸長不殫能于再割遂令鯁質進爾清光誓且窺
管于天自涔而海漸識三墳之大稍知二首之疑俾免
多言是酬洪造

授龍圖閣謝恩表

按本傳庠復知政事罷祁翰
林學士改龍圖學士庠復參

政在慶歷
五年正月

臣某言伏奉制命蒙恩特授臣兼龍圖閣學士者停直
複門徙恩層閣本緣親而自乞蒙引籍以對除揆寵兼

常無顏容愧竊惟先聖有作叢構實典鬱律辰居之嚴
襲積霧圖之廣踵華創職稱是取材肇允榮塗何嘗輕
授伏念臣識局庸淺術學庸孱入忝玉堂間陪講殿徒
以樸忠無飾孤耿自將附湜湜于涇清守嚶嚶于雨晦
賴天燾煦曠日保全適以臣兄庠召自外藩復參大政
理所宜避地不居嫌稽首請間素言敘懇丐上還于禁
籍得專侍于經帷伏蒙皇帝陛下見謂由衷特從換秩
罷茲要近處以清閒拂佹儼之塵容塵螻蛄之寶宇伏

況臣出入三歲便蕃五遷四叨學士之名罕見從官之
比雖素領焦禿病幹疔癰器極斗筲之容利止鉛刀之
割尚當勉懦為立續短俾長倘有補于涓銖矢不忘于
隕路

上謝復侍讀學士表

按本傳祁以張貴妃事出知
許州甫數月復召為侍讀學

士表中止停嚴直猶屏大藩曾未半暮至頌成
命正指是也張貴妃事在皇祐元年又慶歷八
年五月庠為樞密祁復為翰林學
士此時祁當有一謝表今集內未見

臣某言今月十八日馬遞到官誥敕牒各一通授臣依

前充翰林侍讀學士仍放朝謝者左符待罪方做常箴
中制疏恩遽還近職校前尤之註謬艷來寵之便蕃撫
己銜榮無顏容愧伏念臣福祚單狹性局憊煩踰躍至
愚坯陶上教因隨士夫之課謹修官學之方入直文林
進簪侍筆從鸚鵡之游豫備虎觀之討論薦許為邦猷
蒙納節序躋天掖祇演王綸再忝複門之游久奉華光
之學至于刪定條約豫法家之議者三年整比京司牧
縣官之財者萬計止貪云補罔避謗囂仍因撻句之間

嘗遽通言之訪質當今之謂利病靡敢度情語前世所以存亡或蒙稱善以孤遠之質荷顯印之知播于傳聞寧無妬媚何者一金被賞來衆口之毀銷寸的取褒啓百夫之決拾名盛難處援寡易危況復因希濶之儀抵忘誤之禁緣為飛語遂浼至聰所賴公議原情眷慈含垢憫一青之失義有相除在三教之科愚最無害止停嚴直猶屏大藩曾未半朞亟頒成命舉已除之籍復署禁扉慎數易之宜仍留州閣孤心按堵蹇步良行此蓋

皇帝陛下養以至仁納之大度忍令久棄俄與自新冒
陳極以流膏破幽盆而逗照故綏更飾足追露見之矜
新組交垂遂免寒灰之辱况臣素探前載粗識大方謂
事君之盡忠不忘于外知獲罪之無禱有私在天水雖
折而猶東石可磨而弗撓謹當宣明厥守煎漑爾疵夙
夜匪告于勞淄磷不昧其節河湍日皎有如自誓之言
弦勁韋柔參服攸聞之戒獲收涓效歸報洪私

景文集卷三十七

欽定四庫全書

集部

景文集卷三十八至四十

詳校官侍講臣王燕緒

檢討臣何思鈞覆勘

總校官候補中允臣王燕緒

校對官學錄臣謝登雋

謄錄監生臣汪國均

欽定四庫全書

景文集卷三十八

宋 宋祁 撰

表

讓恩表

宋史仁宗本紀皇祐二年九月大享天地於明堂親命讓表內欽柴已事湛露函

禧及進三品之美階如八柱之榮數云
云蓋即讓進封常山郡開國侯恩也

臣某言欽柴已事湛露函禧叨預祕樞均推渥典席恩
徽之累等捫心極之有涯敢援叨辭啟停蕃錫竊念臣

久塵幾緯無補顯猷仰就德以日躋罄小心而昭事悖
崇秩禮震動殊休歷款先祐而遂見閔宮哀對上靈而
升侑文考光華接於旦暮汪濊塞乎天淵內慙衰殘法
當侍從襜如進揖寧善於魯儀肅若動心但欽於漢瑞
獲紓不敏之咎已銜大庇之仁敢冀睿明首褒機管錫
之崇號訓以懋功進三品之美階加八柱之榮數靜言
匪服祇足憎慙且夫禮行於郊孰非展宸勲在於策斯
可歸勤苟曰罔功率為不稱矧當三接之地尤寄百度

之宜寵既自叨勸將何有伏望皇帝陛下矜立志之難
奪靡間於匹夫察過令而必收罔論於渙汗丐還虛授
庸息羣言叩善聽之彌高露危情而偕極期於從欲是
免濫官

謝覃恩轉給事中表

臣某言伏奉制命授臣給事中依前充職進封常山郡
開國侯加食邑五百戶散官勲如故者休成筵祀恩賚
庶工錄臺絕之少勤枉帝緒之平施進升官著申衍侯

疆榮雖例加愧實中積伏念臣性分疏拙學習空虛逢
時盛明與衆倫比向塵詞署自抵禁條嘗從解籍之科
亟沐賜環之召老馬無棄姑結戀軒之勞楹木未殫已
辯伐檀之誤專陪勸講彌通清閒居嘗刻肌坐或忘食
以為鍛翼方奮勢不高飛折足始痊誓無疾走冀保全
於晚節慚云補於厚恩會國家推攷上儀懋峻宗祀福
不專饗澤乃普頒眷渥薄之孤生忝光華之旅賁瑣闥
增秩望郡陪封追論講求之功適當容典之局禮有因

草皆中詔自親其文議或糾紛故上心制定其當合任
隳官之咎顧偕躡等之遷此蓋皇帝陛下德暢多方仁
包有截和氣中律庶彙並甄太陽垂光萬影同見遂令
羈宦豫齒褒章步區舍之重深食戶租之優富罔功被
賜誠無獨讓之階累日儲勞願補他年之最涓分可効
糜殞為期

謝復兼龍圖閣學士表

案本傳祁以祀明堂遷給事中兼龍圖閣學士今集

內表謝兩次必當時亦兩次加恩本傳統言之耳

臣某言臣伏奉制命授依前給事中翰林侍讀學士兼
前件職者思洗曩愆寵還故授緣榮得忤顧忝成慙竊
念臣識局忝冥學機杆格久塵法從再直禁垣謬誤隳
官傍徨去國遽瑗之老何止於知非石建之愚自甘於
抵死永言孤跡俄軫上慈外停刺史之符入引露門之
籍用是晝分忘饋夜艾輟瞑收擢短才詭成來效報深
恩於骨肉掩餘誚於防川伏遇皇帝陛下修祀合宮均
釐環海幸參圖始訖覲告成普賚侍祠例蒙扶秩尚念

過雖一解職未盡歸再紆泥縛之褒仍歷霧圖之祕倚
膏沃朽破節延暉要駕復驂漸習安行之謹傷禽已奮
益懲虛墮之虞敢不祛拂蒙禁申尋典學服攸箴之訓
匪懈厥躬有如日之明不忘於素涓分可効躋殞為輕

亳州謝上表

葉表內云二月者乃皇祐三年之二月也據本傳及續通鑑長編祁坐其

子從張方彥游出知亳州庫亦以不戢子弟為包拯所奏於三月罷相出知河南但觀祁表宿疾繼作及難參法從顧守外藩等語係因疾乞外並無為子引罪之語疑祁知亳州尚在其子事未發之前

前庫知河南則在其子事既發之後

臣某言伏奉二月詔書差臣知亳州軍州事臣即於三月二十八日到任訖過陽舊里譙社勝區聯輿二京之間參雄三輔之亞長人如此銜賜無涯伏念臣學本迂疎性非通曉叨塵禁近久歷歲時惟悉心以事君不因回而取福居常斂分動輒省身正以所得之名多浮於實匪衷之服易用致災比年以來宿疚繼作兩鬢紛白餘日何幾雙目眩昏飛花無數難參法從願守外藩伏蒙皇帝陛下裁貸愆愚記憐面目申擇善地俾總化條

顧臣此州所領七縣盜賊數發流亡尚多所賚首麥向
登膏澍仍降力農相怵比屋寢安仰惟清衷無及多軫
臣亦早侍祕幄屢耳聖言以四方宣力則和雖一夫失
所為負敢不勉責吏事勤喻詔恩向冀刑罰稍衰手足
知措倉庫向實禮節可興勉衰債之殘軀報光榮之誤
寵違顏方通結戀徒深

定州到任謝表

宋續通鑑長編皇祐五年正月士
戌知成德軍宋祁知定州與本傳

及此表俱相符合其成德軍到任在前
年七月故表云甫及半暮更忝茲授也

臣某言伏奉正月日制詔就移臣充定州路都部署兼
安撫使兼知定州臣以二月二十五日到任訖由中被
詔益北護邊外循衰癯陰訟庸短強顏臨部捫感充膺
伏以中山之區河朔為劇作國垣扞壓敵喉襟高墉萃
而雲聯諸屯班以棊置風俗質儉氣尚強雄從古以還
號勁兵處自四道分帥大將須才韓琦以舊臣之勞實
首茲選出入六載經營百為補綻成完斂頑就法聲績
明具綱條設張考課上聞居治第一伏惟皇帝陛下精

覈吏事留意塞防謂琦報政之成進易其地惟定代更
之重謹擇於人過聽腐儒俾嗣前最伏念臣稱自寒素
得廁班行所習簡牘之功不知軍旅之務比嘗出守止
責親民故於歲成偶紓官坐自塵真定之擢遂總中權
之華定命不可以固讓還遠戍不可以不才解徑趨所
蒞甫及半暮詎謂僉言更忝茲授官併二組地綿九州
且臣自揆所能出羣臣之下遠甚潛計其齒去六十之
年幾何論公則應黜乃遷語私則當閒反劇懼溢於喜

榮弗蓋慙况此州遭水潦之餘困儲廩之積且食先軍足士以馬強今乃庾乏億秭之饒牧微駉牝之衍賢守未辦况臣至愚謀夫深憂况臣淺識斗筭陋器蒲柳餘陰倚以成功判於諉事然聞生者士所重徇義則輕兵者器則凶忘教斯怠臣既粗識前載數剽大猷雖旅力復弗強知忠孝在所尚當悉心細大自力宵旰奮練戎行綏育生聚有如緩急而可用曾是掎克之靡加至於事當便宜物有長利奉上無隱據義固爭敢冀睿慈每

賜裁赦乘鄣在遠拱宁賒期心溯凝宸魂棲清戟

謝加端明表

案本傳祁在定州上禦戎論七篇加端明殿學士進論在至和二年見之歷

代名臣奏議詰敕在八月見本集轉端明殿學士謝執政啟

乘塞無狀增秩蒙褒賜予侑頒心顏交靳伏念臣才弗振俗仕偶逢時備內朝臣十有六載學不足膺天子之問文無以代王者之言遂圖外遷冀云少補惟定武一道直契丹右廷咸平以來號勁兵處自夏竦分建四帥韓琦始領九州節制中軍部分諸將琦既進律臣實代

居以一介懦儒當萬夫要任詎難辭劇奮靡顧愚然臣
所習者藝文未曉者軍旅用非所習雖勤而弗效責於
未曉故技必有窮用是再暮居無底績在法云殿惟黜
是宜乃蒙皇帝陛下憫久成之勞排彼譖之侈雖遠猶
錄謂拙可矜收雲閣之故資著丹殿之新籍仍秩經省
未易守藩叢沓徽章夸嫖鄙邑重降嚴旨切卻讓封臣
亦內揆愚心旁諭公議若循禮疊請則恐涉不誠或固
節還恩又似規早罷不有粗使誰扞邊疆例格除音孰

尊寵數輒昧涯分祗服器名曰三省以自營身九殞而
奚報但臣所念者邊務至重敵詐益滋得人失人繫今
日輕重知己知彼為天下安危而有司特用苛法相挺
守臣類以生事為解封侯畏怯不敢搖手倉庫虛乏正
可寒心建明累上而朝省未從姑息小虧則謗囂立至
況臣衰晏素自憊冥判無成功徒忝休命望審擇於豪
俊俾臨統於方隅設張遠謀羈制驕狄因罄敷于感臆
竊附列於瞽言朔壘地卑君門天阻被符蠲謁攬綬知

榮

益州謝上表

梁祁知益州在嘉祐元年八月到任在次年二月

臣某言昨被嘉祐元年八月詔書授臣吏部侍郎仍舊
職移知益州臣以九月解定州符印十月過闕下又奉
詔旨許朝見面賜訓敕自見逮辭凡一月即乘驛趨官
以今年二月二十日領州事既見官屬即徧詢問并病
利皆言稼穡蕃稔雨暘順時人安常業物無翔價吏下
如律邊尉弛虞事便於宜人重犯禁無逃與邇式舞而

歌臣身所聞見與言符驗伏乞睿慈少寬勤卹責臣治
理保致靖嘉伏念臣早蒙記識得籍近嚴惟知悉心事
君未嘗枉道從衆是以將賀而弔至未譽而毀從一去
朝聯四易藩守前日鬚澤變為華顛向時強力鬱已阨
瘁今又走五千里之遠委西南面之雄職進華資冒取
豐秩斷斷之技斯罄悠悠之言云何此蓋皇帝陛下翕
受庶工善養多士容瑩助日收壤培山料錄冗微俾充
器使然臣愚有所稟志不可遷故直尺若尋自視無愧



食茶而薺罔有憚行況茲圖政之辰敢負惟良之委昔
王尊一叱其馭便說忠臣何武轉而上聞粗裨盛德臣
於茲事未謝前人假節方初造廷云阻叢感斯望臨文
罔宣

謝龍圖表

案本傳祁知益州還以包拯言其兄方
執政不可任三司乃加龍圖閣學士據

本集西州撰彙系題云自嘉祐初來州已聞再薺
則此時當為嘉祐四年祁自慶曆三年知制誥授
龍圖直學士至此已歷十七年至表內所云翰林
端明者各再龍圖閣侍讀者三今本傳惟再為翰
林可攷端明則一見於知定州之日未詳其再龍
圖則一見於罷翰林學士之時再見於祀明堂遷

給事中之時侍讀則一見於從知審官院
之時再見於許州復召之時俱未詳其三

右臣伏奉今月七日中書劄子以臣陳讓龍圖閣學士
奉聖旨令臣依累降聖旨不許辭讓便令受告敕者危
悚數陳嚴音三卻拒命難固蒙寵增慙伏念臣天俾忝
愚性止崖介時借其運實不副名然十七年中徧踐美
職為龍圖閣直學士者一翰林端明殿者各再龍圖閣
侍讀者三今又叢資累華併為異數當今兩制兼職皆
不逮臣材劣衆賢而恩冠近列是以亟剖丹若上格詔

文渙汗弗收匹夫終奪昔三綬為侈兩印自矜未若臣
祕禁經筵寶圖重構銜置重複班級高華此蓋皇帝陛
下垂憐衰殘早經驅策因避嫌之請增通籍之榮鉅鉞
廐駒稱服珍帶山岳施重螻螳命輕論報何階撫躬如
隕

鄭州謝到任表

崇禎知鄭州在
嘉祐四年四月

臣某言伏奉四月十九日詔書授臣依前官加龍圖閣
學士知鄭州臣見乞免所加職名候朝旨外已於今月

二十四日到任上事訖讓還劇使恩與近藩始冀避親
終成冒寵伏念臣器識迂暗年事頗侵前日護邊用非
所習向來治蜀煩不值能蒙賜代符進遷計職適以臣
兄庠冠樞近之秩參調發之繁詎不處嫌理容上訴果
沐中旨許收誤恩復以華資寘於便地陪京甚邇舉族
自安此蓋皇帝陛下大造曲成至慈善養釋臣多懼惠
臣更生臣敢不奉揚化條刻誦聖訓尚期寸效歸謝上
仁

謝加常山郡開國公表

集仁宗本紀嘉祐四年十月癸酉大禧於太廟大赦

戊寅加恩百官祁時知鄭州故表
內有盛修合食及鄭土之拘等語

臣某言十月二十三日進奏院遞到救詔伏蒙聖恩授

臣常山郡開國公加食邑實封者制出中天恩臨叢品

捫躬匪稱拜命載兢伏念臣才不適時智非周物坐逢

熙序歷踐華塗會國家追講曠代之遺盛修合食之享

孝思上格臣職駿奔俯惟守土之拘莫預奉璋之助魂

馳龍宸魄集駑棕恭惟皇帝陛下凱澤一均至仁四被

靡間尋陋例霑寵榮集超列爵之高益厚加田之目涓
塵微效夙無補於聖猷穹壤殊私遽併膺於獎典重恩
難讓愚悃奚安徒鏤骨以自期庶粉軀而論報

謝轉工部尚書表

集本傳唐書成祁遷左丞進工部尚書進唐書在嘉祐五年六

月時祁尚在鄭州至次年始進謝表故云奉去
年六月制詔又祁有讓轉左丞劄子見本集

臣某言奉去年六月二十三日制詔授臣工部尚書職
任勲封食實封賜等並如舊仍放朝謝者成命臨下愧
汗交顏伏念臣性本迂疎能有涯分論撰清選每得竄

名雖邇要至雄亦叨假節奏課弗效誤眷無酬向以衆
力成書特恩進秩避讓既卻冒受尚新俄錄歲勤更偕
省坐名品尤峻遲暮難堪但四載叙遷已成定制一辭
祈免恐近取名輒服褒言肅祇官次此蓋伏遇皇帝陞
下廣無遺覆照必逮微垂記孤臣普加涉典敢不益勉
孱陋愈探典刑筋骨昭銘消埃塵效

讓加承旨表

崇禎通鑑長編嘉祐六年二月甲辰
詔翰林學士承旨宋祁遇入直許一

人主湯藥祁以羸疾請之也加承旨
在五年中祁卒則在是年五月丁酉

右臣今月二十二日閣門降到誥敕各一道授臣翰林
學士承旨依前兼端明殿學士翰林侍讀學士者聞命
震驚撫躬愧汗伏念臣病求解郡恩許還朝獲便醫藥
之良以救桑榆之晚是為再造舉戴深仁然自休偃於
私居尚苦纏綿於舊疹深虞盈滿遂致顛隳今茲詔除
尤出望外且承密旨者或膺疾召或訪欲謀法從翠華
之嚴恭持紫橐之重必資該敏仰副眷求如臣者年事
頽侵氣力衰耗且責於必不能者敗加所不宜授者僭

寶累公議致速身災自知甚明人言將至伏望皇帝陛下推雲戢霈破節延光許回誤恩少安危惓誓堅九殞

歸謝鴻私

景文集卷三十八

欽定四庫全書

景文集卷三十九

宋 宋祁 撰

表

代章集賢讓拜相第二表

宋章得象字希言歷官承旨景祐二年知樞密

寶元元年

同平章事

臣某言確摯上陳危言若訥猥煩敕曉尚閔俞從內省
冒陞罔諧寧舍臣聞力不勝而強用者儋石益之則躓

視既勞而猶察者與薪值之亦昏何則才局於素定之
倪效屈於用多之廣早明茲理敢誓固辭伏念臣本自
諸生不經遠物雖圖筮仕止望易農嚮緣邇禁之聯遂
忝鴻樞之領投髀嬰屢缺之畏躡足微必勝之籌衆不
可誣事皆已試寧足越司天宰之柄上憲乾台之華昏
於已窮躡乎強用名器者天下之重師尹者列辟爾瞻
濫始於茲下安取法抑又聞宜負而乘小人之盜竇招
不狩有鷄無功之祿為刺巧於室者弗令橈而貽壓受

其器者非欲滿而就傾如臣所懷舉皆類此況今權剛
俾乂憲度交修方當訪弱翁之賢總領衆職資胡廣之
問練達朝章無令蕭枕之餘首玷論思之地伏望皇帝
陛下念任人之尤重諒省分之足矜質臣以彼己之言
許停贊制免臣以疾顛之咎俾示曲全耆哲在廷俊髦
布列枚功而舉謀國必臧滙危款以罄聞仰睿音之垂
可

代楊太尉讓加節度使第一表

案楊崇勳字寶臣
明道元年授檢校

太尉山南東道節度加樞密
二年同中書門下平章事

臣某言伏奉今月某日制命以修葺大內了畢加臣某
官落成在旦懋賞均禧由置局之有經枉推恩而異等
罔功已甚拜賜不遑竊念臣自闡葺之中邁亨嘉之會
器非適用食乃浮人椎頓少文罔裨于紀律樸忠自任
僅宿于官箴猥蒙大度之容進貳中樞之職一昨大營
層構別建攸司領使以上公之尊咨副于通臣之列不
圖推擇偶及妄庸臣于斯時罔及崇讓誠以二宮側身

之際百役僇功之辰冀率寸長仰寬旰食其如庶民樂
勸百堵竝興有茂宰以見規有勞臣之宣力臣但參陪
廟算奉行符節無黍稷之重無涓塹之勞訖太紫之雄
成塞天淵而渙汗猥紆成命序進寵名錫號以紀庸爰
田而衍食本兵劇職疏社近藩而臣退省其私何力之
有掩上之功則在體不順掠下之美則多謗其興取身
之災為國深悔兩失其道入將謂何伏望皇帝陛下收
已澍之仁據循名之實許還誤賞無俾濫官責其陳力

之微紓以害盈之咎日有三舍或遇感而必移志在匹夫信有誠而無奪援天惟切得請是期

代楊太尉謝加節度使表

臣某言近以虔奉制恩驟膺寵數尋露章而再瀆冀還賞於至公游沐慈音仍斷來表祈天靡諒拜命知榮竊念臣論品下中賦材弱植緣先朝之誤寵收一介之微勞感會風雲汙塵名器執戈外禦適遘偃兵之期涉級序升遂竊登壇之拜總提師律拱衛宸居積日為慙無

勞可紀不圖聖獎擢貳近樞坐席未溫營宮勿亟咨宰
庭而命使挾戎帥以領徒曾是妄庸亦參經畫逮落成
之告始顧居逸以興懷百詔攸司聿陳盛禮應天以實
衷對於廟靈與物惟新茂宣於雷解祈年易日集福推
恩而臣底績至微備員有素因端闡之第賞紆溫檢以
開榮視秩本兵建藩維翰益勲臣之殊號增采邑之真
封矧基命預聞通臣同體上方引咎克謹於盈成下或
分功何顏於啟處寵靈踰分震怖裝懷滙懇固辭成命

難寢亟煩褒諭祇益罪尤斯蓋伏蒙皇帝陛下變復在
辰寬仁布度姑厚惟平之施勉從寧僭之科臣敢不祇
服訓言罄輸忠力防幾事之誠無俾害成佩進忠之言
更思盡瘁永惟素守用質幽神

代上皇太后第一表

臣某言斯干勿亟式壯宸居麗澤遂行首褒樞管省貪
天而冒賞舉跼地以增憂竊念臣智效有涯親逢為幸
宜疎而裨濡翼於梁倚上聖之兼包過煩言之舉劾擢

於宿衛外佐樞衡間屬完復宣溫繕圖輪奐事資專達
別建攸司官必有聯用均底績臣始從末至遽貳敷求
冀千慮於參裨希萬分於報稱而寸長自驗任重咸知
上則祇稟於謀謨次乃倚成於衆力秩未加而爭勉功
不日以慶成千門翬飛百堵山立而臣委此在列拱默
居官訖乏僛功之能仰裨煩使之任今乃溫辭誕告列
位徧聞特移近鎮之崇兼領上公之秩任官密勿廩食
豐融曾是冒居疇能安處雖含垢者天道姑務樂成而

缺望者衆心無容厭服伏望皇太后陛下察其退省惠
以克終追改命書弗加虛飾必若篤臣鄰之分懋功賞
之科則陳力有期或容於積日陟明無濫更俟於宣勞
臣止乞比類近班例外彙序庶乎不僭以肅無厭願回
從欲之仁垂采薄言之訴怔忡於此俞可是期

代第二表

臣某言臣近以崇進寵章輒騰讓奏大言垂答成命未
還慙衷所并懾處無措竊念臣材姿蹇淺地望單平獲

對聖期遂階樞柄汲深綆短自審於無能材敗錦傷慮
隳於有典值國家從周考室嗣禹卑宮獲贊事經亟成
丕績惟當陽之引咎因肆眚以翔仁首眷近班並推異
數鴻私交委危懇匪寧何則密勿之司體均休戚彌縫
之任責在臣鄰當九重旰食以勵精寧百執晏安於受
爵上虧治表俯畏人言伏望皇太后陛下垂照危悚曲
全瑣質重名與器罔俾于官邪收縉以綸特從於人欲
儻遑易盈之責實銜再造之私

代謝皇太后表

臣某言近膺制命崇進寵章再瀝危悰冀回誤賞俄枉
斷章之旨俾遵踐次之規徇守莫從拜嘉何幸竊念臣
本由羈齒復邁亨期頃在先朝已嘗劇職協華繼照圖
舊見收擢領干城留參離衛漢臣少懃僅乃過之林父
盡忠自知底止偶偕天幸遂貳帝樞親佩疇咨之言預
聞甚衆之事營宮度室權使慮功匪伊之人姑願宣力
而靈臺勿亟斯干落成惟翼翼之小心答高高之深戒

肆類霄極祇格廟祧沛為鴻恩賚及羣品薰至和於有
截示昭德之不違乃眷臣工並推獎數而臣揆庸最淺
進律首加奄土宇之販章擁名器之烜赫疾顛是懼薄
訴載勤而孤根莫隔於青春盆遂均於白日循牆罔
獲濡沫增慙斯蓋皇太后陛下協暢懿綱輔成至治謂
已行之賜寧僭而不收俾無用之臣未勞而先祿敢不
力希汝弼務告斯猷式是柔嘉保乎慎密循孤生而有
託喻厚報以無涯

代楊太尉讓樞密使第一表

案楊太尉
即楊崇勳

臣某言伏奉今月五日麻制授臣依前官充樞密使餘
如故者躡等之恩猥加叢質本兵之地超以宗工聆誕
告以不遑撫危心而如灼竊以天人感會之要夙夜宵
密之嚴號為樞衡罔私名器自匪安世之慎林父之忠
履無重綱之疑進有九鼎之重必程茲效始免冒居如
臣者根柢微材斗筭近器親逢聖旦假歷要塗將將之
仁上依於漢度師師之序久玷於堯官中寢告成攸司

可力例蒙霽寵改就近藩讓不獲從坐猶未暇旋頒渙
號俾正使名總異數以大來匪孤臣之克荷且臣聞之
愛官同乎美錦用士異於積薪使人皆學製則百度且
虧後而居上則有功不勸而況擢於數臣之末抗乎三
事之尊力且未陳進仍無漸伏望皇帝陛下據其器使
貸以滿盈追罷徽章許仍故處用勤補過少冀於萬分
歷級升階況存於有典庶全邦體恭俟天從

代上皇太后第一表

臣某言隆名烜赫異數便蕃辱誕告於王庭俾顯升於
樞府缺然無狀惴若臨淵竊以運動二儀本之樞軸昭
明萬事責在股肱自置使以居中匪得人而莫可況丁
下武尤慎曠僚伏念臣系本孤平材微開濟由驂之靳
四服於馳驅如山出雲偶邀於期會任圖大事茲報萬
分因考室之微功辱改藩之茂渥號封兼列錫予孔蕃
方且深雪愆冥講求故實俟愚者之一得塞小人之攸
箴而成命渚頒榮階逾縟由數臣之後進領上司未三

旬之間再煩大貺顧惟冒處實速多言且用在材表者
有必窮之期賞超功外者無能守之實下取四夷之哂
上紊百工之倫祇悔既多害盈可待伏望皇太后陛下
諒其悃悞輟乃寵章且延積日之期俾竭寸長之效漸
希有補乃議叙升在授受以為宜亦等威之不僭倘蒙
順許是免顛隤

代楊太尉讓樞密使第二表

臣某言昨以肅膺茂典進列上樞亟露奏函願還賞典

叢爾之誠無感往哉之訓不移夙夜以思懔懔罔寘竊
惟官可以闕不可任非其人邑雖與多無容假之以器
何則十手甚衆百度所叢允當則丕命其承虛授則浮
言胥動況幾微開策左右仰承累苟及邦身焉賴寵臣
甫從末至未究大猷猥屬建元例蒙進律已忍慙而冒
處冀陳力以少疇寧謂宸衷過私贊畫旋降正名宥密
之署財成一二之幾內揆妄庸曷先勝處夫棟幹或橈
則困於衆材馬力已殫必要其所駕國之闕政常必由

之士有食功亦宜底止伏望皇帝陛下追收允令改命
能賢暴剝牘於百工紓賤軀之九殞罄敷危控虔俟俞
從

同前上皇太后第二表

臣某言近膺明制擢拜上司入並宗臣對執樞柄尋露
情於尺奏冀收縟於誤恩答命雖頒俞音彌阻省循至
再震越無從臣聞善持器者不欲滿而就傾巧度材者
不使曲而強直物宜尚爾人理則然故責功者過量乃

傷陳力者不能而止敢授斯喻備述愚衷竊念臣慮靡
經邦官纔宿業獲階近級未及半暮爵與衆而例加讓
蒙恩而弗聽瘵官之誚曷日可逃不圖含垢之仁復舉
揚庭之典知小謀大任重道悠國有曠官身餘後咎脫
致彝倫之紊寧容一介之誅伏望皇太后陛下體斷斷
之能居然筮短察縷縷之請罔俾官邪許停授受之恩
實荷平成之賜

代楊太尉謝樞密使表

臣某言昨以叨膺茂典入管鴻樞伏省戶以陳章丐綈
囊之收需危惊再瀆明制必行懼煩失以致尤輒進思
而冒處臣聞佐王基命簡在臣鄰秉軸居中本之兵柄
非有號令風采為下所瞻則必怛臆謀謨熙天之載異
於茲道孰匪曠官竊念臣材庸乏施地寒寡援與顏行
之下因得累勞陪周衛之中罕嘗進熟見容漢皇之度
久總軒師之營貳宰繁機佐經中寢會落成而不日因
茲祀以祈年汪濊深仁道迎協氣而臣涕從災異之變

更加名器之多寢默懷安委蛇就列內循無狀自詭必
酬何月律之未淹沐天私而載造擢於末綴遂正近司
輒成奏以讓還枉深辭之切敕薄言匪控進拜增羞助
百姓之昭明行虞辱國干六符之疏濶舉畏談天斯蓋
皇帝陛下養以至仁赦其少戇同五帝之親事不及有
司俾一介之孤臣無空大位敢不益勤隸力罔伏舊章
期有補於萬分敢自紆於九殞

同前謝皇太后表

臣某言近叨恩制俾正樞司伏閣上言願還於成命斷
章催拜再枉於慈音固讓莫諧冒居何幸竊念臣液櫛
材散培塿地卑獲對聖期屢揚劇任敵王所愾既會於
偃兵積日之勞何從而塞責洪惟職履深諒由東斯謀
斯猷罕嘗入告予求予取不議汝瑕惟先帝之舊人貳
禁庭之幾事屬圖考室兼議僞功燕寢乃安顧成並享
紀年肆眚舍爵計功首膺無戲之言已援于宣之數僭
夫國典布在人言豈謂天眷謬加寵章尤渥靡倫彝序

超據上游壅薄訴於危心隔蓋高之善聽光華異等震
抃裝懷三接詔詎未識主臣之對萬幾處可曷臻密靖
之風乘是泰來缺然升授此蓋伏蒙皇太后陛下道敷
善養人不備求貸衛綰之孰何取子顏之謹質特捐厚
禮期責寸長顧懋賞以不訾誓捐軀而有所

代楊樞密謝加恩第一表

臣某言廟藉藏儀並修於典業飲勲論至申告於治朝
顧無狀之具臣濫本兵之右職便蕃荷寵懋姪交顏竊

聞賞以功為重輕官用能為次序故公器者假之於下
則伐檀之刺興天秩者授之以庸則緇衣之風勸上闕
損益昭見典章如臣者志抱樸忠任非文敏攀鱗附翼
實出親逢壯事老謀驗於已試擢升宥密未閱歲時蒙
舍垢之至仁遏空飡之橫議宣惟天幸丞相帝容陪駝
乘以清塵從春旂而賑士徧升七室用劭九農而臣自
始屬圖則乏倪寬之建白逮於相禮則有孟僖之坐慙
奉凝蹕之還衡琢溫瑜而升冊曾微千慮少答萬分免

戾為多開榮非覲又况崇階異數衍食陪封即舊以表
其新臨懼更延其寵臣躬雖幸國體謂何儻腊毒以冒
居實敗材之行及伏望皇帝陛下推明有典詢逮羣言
用必役其所長賞不加於非次收還成命昭示陪官弗
與鐘鼓之妖俾緩冰淵之懼探情非飾瀆聖奚逃

同前上皇太后第一表

臣某言廟筵升裸陽土就耕並成希濶之儀徧第臣鄰
之賞顧惟輜眇猥玷近樞優渥首加震惶罔寔竊念臣

器非適用材不及中感會風雲湔除埃壘厯更華劇滋
驚歲時曾不能僂俛宿官從容進執建明事望練達政
宜徒以上庠晏晏之仁中懷齷齪之謹曲輪直桷有性
分之專乘雁雙鳬無盈虛之係入司機管參決謀謨屬
以慈極奉先長君勸穡枚枚閱宇薦一德之馨香昀昀
大田震九陽之滿昔禮兼今昔聲塞天淵而臣但荷親
逢絕無云補將順其美則當國之輔在焉屬圖其儀則
搢紳之儒戾至安可因飲至之際遂竊崇階無計功之

差例增采戶使勞臣舛望多謗沸騰尚貽戮於代天諒
胡顏於接畫伏望皇太后陛下察其知止惠以有終協
贊當陽垂收渙汗且夫物過於鑑則照有必窮鼎渥其
刑則餽將必覆願為慈護矜允危悚或免戾之可期實
捐軀而知報

代宋資政謝大學士表

宋綬字公垂歷官參知政事資政殿大學士

臣某言伏奉制命云云者大言申獎清職踵華揆寵欲
驚置顏靡所竊念臣稟生微弱循志樸忠典學在勤課

功寡要惟仁與義慕大夫之求匪智而愚為有道之累
逮事真考已列從官愛不汝疵舉知帝力伏惟皇帝陛
下適成丕烈樂育謨材專錄文林之勤召升嚴署之遽
嘗令守屏旋詔歸臺肇啟祕宸顯標通籍時惟輔相之
缺忝貳論思之餘躋聖在宸備員取悔蒙收還於機務
乃厭息於謗言改服禁班別陪經省仰緣簪履之舊奉
望帷幄之中然而志以憂摧氣隨懼奪煩心易感末疾
間乘孰為四體之勤纔煩三月之免彌年無狀有衆具

知敢圖則哲之明更濫惟名之假矧茲峻等創自先朝
未始平除蓋無常置本臣鄰之均逸故位絕以至優寧
容孤生冒處茲任竄景風之餘曲取朝佩之深譏斯蓋
陛下夙諒孤危審非離黨大明垂燭蔀屋之家罔遺和
氣儕蒸拔楊之祗重茂靜循榮渥覓絕常均儻可效於
寸長誓無忘於夕陽

代謝加恩表

臣某言昨以虔貢露封讓還渥典叨辭雖達善聽靡回

煩深詔以為言俾斷章而趣受拒恩難瀆拜賜奚勝竊
念臣稟質至愚逢辰最舊久參宰政訖乏寸長嚮屬三
歲常郊萬靈介祉翼翼文考推以配天實實閔庭盥而
竝薦得陪顯相協藏上儀居謝徐生之容無俾伯始之
問何言飲至亦與疇勞內積冒居之慙慮開缺望之隙
丐收茂渙用穆彛經而遶布俞音慎行出令廢其悃悞
敦以寵靈表雲臺之美名竒巖廊之要望階章魏品之
峻勲柱楚官之華參萃於斯為榮尤至得非寧賞而僭

在邦體之則然匪汝為疵恃君養而無恐輒膺敷錫增
激懦衷此蓋陛下欽待臣鄰懋明憲度祿以為砥礪磨
鈍於人賜不踰時示勸能於後遂令絀薄首被慶私惟
百慮以勉修期萬分之稱報

代孫侍郎謝加龍圖閣學士表二首

宋孫奭字復
古仁宗即位

遷工部侍郎天聖
中加龍圖閣學士

臣某言天臺封劄忽被於癯姿神閣直圖俾陪於清綴
即支離之病叟參汗漫之仙游崇讓無從省躬增悞竊

念臣材非傑出世本曠僚志安草茅望隔青紫逮事真
考擢備從官預擁橋門之經俄待承明之詔力非稽古
陳車服以既多義乃不耕食困禾而太厚託上仁之廉
養匪予取以見疵訖乏寸長以終無補陛下丕承在旦
善貸均休念舊物以軫慈由至愚而取信每緣沛洽渚
辱進升出則陪清道之遊入則奉邇言之問龍光所集
儒者罕階頃緣匪服之災迭邁負薪之疾氣一交還體
不自支陟月卧廬移書請急方將再拜歸道漸露乞骸

之求百工咸熙少息瘵官之議雖私悰內斷會成命已
頒謂寶構之嚴凝號文林之極摯青蒲規地近接禁林
朱葉藏文居然帝所以原簪之未棄俾龍署以叨榮嘉
亨允鍾夙慕深計且臣忝識大分久服近班仲於至明
誼不徒讓又被寵先帝結犬馬之戀深歸報二宮慮桑
榆之日短苟逡巡違命偃蹇懷安上孤圖任之私下取
自高之譽臣雖無狀寧昧所歸輒拜貺以自天誓糜軀
而有地儻神明之觀未耗而筋力之能可求尚當夜思

畫行克守無邪之戒早入晚出懋敦時敏之方展四體
以上酬泯百生而後已

臣某言葦戶病居方累支離之歎蘭圖祕構忽塵清切
之司駭細劄之已行躍羸軀而祇受一辭罔遂三省增
慙竊念臣學術本疎行能無算起家東鄙玷跡周行紆
真聖之誤知偕邇臣之旅進淺謀料事無助幄中之籌
直道干時常貸道邊之死計功未效僭賞云多恭遇皇
帝陛下察無他腸垂矜舊物忘其蓬穎之陋飾夫犧木

之文超羣神深存陪講勸而臣將身寡術匪服挺災及此首冬繼成淹卧造朝希濶伏枕纏綿且念舊章不忘臣則無胡廣之智大事垂問臣則乏仲舒之才在九畿以不盈去雙鳧而非少宜先引避以肅懦貪私計未行洪恩俄降罔示汰澄之責更階嚴近之資臣夙夜自惟揆卜宜審且下知止足蓋一身之謀上所懋官為百辟之舉苟云圖大無容後公詎可遠忘先帝之恩近矜小讓之節臣知非是物誰謂宜用僂俛以拜嘉勉婆婆而

陳力冀調醫齊益就平彊厲乃樸忠絕其吐茹庶追玉
堂之汙少裨黃髮之詢一死可留期報恩而不朽三軍
能奪誓刻志以無渝至禮不文感悰奚隱

代鄭公授知制誥謝表

臣某言伏奉制命蒙恩特授臣本官知制誥並賜金紫
者祇居宰庭猥具代言之章參華掖署遽塵通貴之階
寵溢所涯畏深餘慄竊以隨風之命本鼓舞於庶方成
綍之言實權輿於四禁張官至重責實惟艱自非業廣

器閎文深識敏揆雅興之明義屏愆忘於舊章則何以
參直祕曹對司允令慎徽布度克成近雅之風給藻會
機仰賁彌文之化親逢景運遘東惟人若臣者篆刻偏
才簪纓墜緒紉先粉之占籍叨神壤以陶風不觀非聖
之書僅承遺業竊冀上農之祿庶代寒耕會天歷之初
元舉貢條之舊式猥緣薄技升冠甲科一命卿僚貳參
郡政逮及瓜之趨節旋給札以試言超踐官坊入塵史
觀承人之乏遂贊計籌邁天之瘡自嬰家釁痛上恩之

未報分餘喘以斯淪哀紀俄周槁骸故在辱台符之振
叙復朝紱之光華荐居勾失之司仍貼記言之局歲逢
會課例及當遷陟諫省以尸榮彌縫未效坐禮闈而辨
秀衡藻無裨靜言備位之慙宜寔黜幽之典乃蒙皇帝
陛下敷求介善樂育羣材念久次於書林絕先容於仕
路特頒俞旨改命清司因程奏之升聞紆睿辭之訓敕
就加金匱之服以獎朝廷之容況職業所存典章可復
各居一戶非人則上動祕躔分押六曹值日則專司進

畫詎伊庸懦可稱恩華然汗令之已行顧驚筋而思勉
謹當奉循丕律輸罄樸忠寢階寡悔之方用畢捐生之
報臣無任戴天荷聖激切屏營之至

景文集卷三十九

欽定四庫全書

景文集卷四十

宋 宋祁 撰

表

代中書謝表

五芝封檢忽頒星掖之文六枳維邦遽貳夏卿之秩驟
叨成命若蹈嚴淵竊念臣材不逮中生惟薄祜邁協華
之聖旦託聞道於先師淳濯槁梧之暝蒙被菁莪之育

洪惟真考顯訓儒猷滌天覽於書林匯化源於璧沼誤
咨艱拙入備詳延誠雖屬於月將慮曷周於天咫以規
為瑱訖無助於四聰有祿乘軒但貽譏於十手大明繼
照時敏聿修識姓名於皁衣軫慈憐於踦履忘其多悔
擢以近班日參桓郁之擁經孤奉漢家之前席矧惟兼
領殆有數司外則閱四方之副封次乃主一王之儀典
虞庠弦誦領厥官聯駟野驪黃專其使局顧寸長之易
竭徒多口之成尤且復強力弗支華顛寢薄第家移病

時容襜被之歸蒙笏書思每代臨文之忘賴九重之矜
體免萬坐於刑章況在榮名敢懷貪覬乃蒙皇帝陛下
至仁格物大度包荒茲因祀之升禋更錄微勞於飲
至以為寧過而立固愈於廢人大德曰生無容其歸報
罔僉羣議特出宸謀頒溫潤之厚辭極龍光於邇著下
收枯木備用於皇居未極景風先行于賞典三循牆而
靡讓九復貫以何言謹當內激誠明仰祇猷訓參一二
而交戒蔽三百於無邪白璧可為慎守先儒之行鳴雞

不已庶無時夜之渝極爾叢軀期於上報

代中書謝不允降官表

一昨緒求天意傳致國章引咎曠僚祈恩貶秩冀以奉
大君之罪已塞黎獻之攸箴洪惟上仁務全治體諭以
包荒之德斷其昧死之章違命莫諧循幸兼極竊念臣
等共陳臚仕獲對顯時邁睿化之日昭乏深謀而夕訪
罔能變定迺及薦饑屯甘澍於西郊漫貪蝗於南畝江
淮土著靡室靡家齊魯力田為凋為瘵百賈皆震九扈

大殘上軫如傷之懷申濟何辜之困切敕長吏還定流
人振康化居緩征濶賦因復省大庖之舉聿遵古訓減
備冊之號以獎至誠過不下移誼無文應而臣等繫同
休戚均下慙舒進見巖廊與知彤日之誠論思前席親
覲雲漢之憂蔑陳稱報之方自保宴安之地遂圖降品
聊示責躬答皇矣之臨觀助勃然之興化言闕清覽情
盡懦衷伏蒙皇帝陛下深護汝疵罔譏彼相奪其小節
約以大猷責孟明之忠俾增厥政重張武之賜式愧其

心赦煩瀆於免冠諭溫純於細札靡加明黜趣勉微功
臣等敢不進撫五辰退求百度開陳熙綽草剡便文漸
臻玉燭之和規復茨梁之積少寬昧旦免玷代工庶依
觀過之仁得及知非之路他官有始捫舌何言

代宰相謝傳宣入伏月令午正歸私第表

右臣等今月一日中使傳宣自入伏日令臣等午正歸
私第者炎隆秉序慈哲推仁以畏日之方陽且揮汗之
相屬特容夙退俾便私居仍盡伏金之辰始舉常參之

限仰銜優遇交極感懷況臣等曠位居多計功無補晨趨暮出自有成規趣駕先期猥煩寬詔欽服從人之惠諒無蒙矚之疴共誓交修少圖報稱

代石太尉謝令安州照管表

臣某言八月日安州進奏院遞到中書劄子奉聖旨已令本州常切照管者寬大之命下濟於天光霰鯨之軀甫還於筮魄發替若輝於龍燭釋憂如出於虎蹊撫續息以幸存奉絲言而增惕竊念臣本惟禱昧獲邁會昌

乏千里之折衝懜四夷之方畧程材六郡獲預於良家
待罪五符詎知於尺籍先帝軫其單賤畧以勤劬靡試
異於外庭遽編名於衛署宣威亭毒屢分四牡之華弭
亂巴賈曾預一夫之勇未能陳力深懼曠官伏遇皇帝
陛下蒼震承休珍圖纂業將懋功而致賞方右武以勸
能俄辱寵章洊膺渥洽乘輅出使蒞施橫草之功飲至
勞旋濫預策勲之爵自爾奉簡書而祇畏飭師律以申
嚴克完犀利之兵上副穆清之寄累勞未驗乃眷益隆

尋復盜起坤維妖興玉壘吳蛇薦食竊弄於庫兵泮樅
未懷敢稽於天討而臣謬當深詔躬佐下軍受堂上之
奇謀制目中之醜敵帝赫斯怒貔貅方議於奮威人得
而誅蟣蝨已聞於相弔天聲大震月捷繼聞俄申戮於
凶渠俾維新於汙俗集成巨伐皆稟睿謨若專徵臣幾
誤大事乃至邊陲屢警戎索載嚴慶兵老上之庭斬級
雲中之塞宸旌直指殄嶠冢之星狼草輅親征見漢家
之武節分屯介士防遏盛秋臣實妄庸獲膺任使敢不

深惟一得之慮載施十駕之勤備重耳之艱難謹武侯
之節制披堅執銳志竭於寸長斬將寧旗誓當於一隊
旋屬穹廬納款左袵通驩兇零罷照於邊烽督亢遄歸
於內地肇建和戎之策茂臻偃伯之期遂復第賞靈臺
酬庸盟府當陽三接屢榮錫馬之侯列國十連均仗齊
壇之鉞繼頒成命出領大藩而不能恪奉詔條勤修職
業畔官離局妄肆於矢言殄行震師果罹於昭憲既具
王庭之獄請從蕭斧之誅豈謂天意好生皇明獨斷屈

成刑之端議申肆眚之大猷止外竄於遐圻俾俯存於
餘喘念一介之賤不忍加誅廓三面之羅與之更始洪
推大賚曠絕常均此際仰舜法之大寬荷堯仁之不殺
挺身萬里甘淪禦魅之區齋志九泉用塞喪元之責未
周成歲尋霈鴻私自臨賀之災陬徙房陵之內郡假青
宮之道侯給長府之庫錢擢於鉗釱之中齒乃衣纓之
列棄簪之賤特軫於上仁涸轍之波彌涵於麗澤仰繫
大度克庇微生敢期再歲之間復降自天之命改陞環

衛徙置方州蟠朽迴春頓茂九陽之氣幽潛發蟄驟驚
百里之音夫何流宥之餘獲覩光華之旦斯蓋陛下阜
昌景化丕闡寶慈以臣久在戎行屢持師節管穴之見
雖無前筋之勤犬馬之勞不捨敝帷之報特形隆旨昭
示守臣俾自勵於操修且深加於存卹不寒之慄潛釋
於冰淵垂暮之年免擠於溝壑事踰初願思極更生再
念臣抱轡以來撫躬至熟誠由爵位太厚尸曠居多失
漢臣醇謹之風冒道家干進之忌冠至誰咎器滿則傾

垂貽折覆之凶上玷清寧之化然而事君無隱靡有於
他腸食肉寡謀薦招於祗悔由物情之靡協致陰譴以
自貽每念前辜敢忘終食謹當上遵彞訓克勵乃誠用
酬觀過之私循致寡尤之地屬桑榆之日索懼螻蟻之
命輕雖貪祿鶴軒深貸百鍰之贖而褻尸馬草愈堅十
死之心臣限以拘留不獲躬詣闕庭無任感激屏營之
至

代晏尚書亳州謝上表

崇晏殊于明道二年以
禮部尚書出守亳州

初違四近出守一麾祇稟詔條奉揚民政擁左魚於官
次僚疲馬於君軒揆寵循躬兢榮慚刻竊念臣本性孤
遠獲對盛明因緣篆刻之徵陶被師儒之誨先皇帝憐
其稚齒獎以片文長育中陵之阿每誠素絲之習遂用
謹敕進服寵光塗飾朱丹湔除埃塽乘人之乏每食輒
浮始自書林寢階辭掖屬星渚之貳極參震邸以為僚
此際出入兩閨遭逢千載寧無越思之過或有奇中之
讒大度兼容多言訖息入躋內署彌邇清光伏遇皇帝

陛下重協審華王承淳烈軫其舊物謂無他腸斷自宸
衷佐經樞莞室大柱小罕不撓之期車重馭煩有必顛
之勢果停密務近守留都旋沐召還再加收試南臺風
憲之地秘殿侍從之榮咸叨踐揚蔑有論報擢司邦計
額領使權雖籠天下之財罔紆縣官之急遽蒙中詔參
預宰庭忘申侯之有疵用王譚於下第論思在旦僂俛
踰年曾不能卓爾建明毅然處可引俊良而咸事故險
謁之庸違開陳治端總領羣職而廊廟之任方夏具瞻

政之無良臣任其咎陛下弗詢徐防之免罔責石慶之
歸人言則姑務納汙天災則不令移過括囊耽祿久已
自知傷錦康官居然衆驗洪惟濬哲終賜保全屬當明
辟之初例舉均勞之典懋官加等作翰疏通道路甚夷
風土差樂恩護其短誼不忍誅再生之慈有死無咎重
念臣夙陶雅化粗識大方蓋知一心事君四體率職惟
書盡信舍道弗營動保廉隅進非紹介受命於地乃冀
於不凋獲罪於天奚取於他禱但以孤特少助依違取

容獨木不林衆怨如府積為拱默之罪上孤振拔之私
徃咎深惟胡顏自處所賴回霜申宥涵海蒙禧廢格典
刑矜憐愚忝乾坤施德厚及於謝生犬馬日長誓思於
補過收桑榆而可待摩頂踵以為期宿業云初乃情增
悽

代加大資知相州謝表

臣某言佐邦無狀解務云初併帖華資峻加茂秩寵光
溢望愧惜交顏竊念臣智不周身材非經國曩緣亨會

超進仕塗興於孤生越致三事先皇帝獎其狂直申以保全擢居震邸之僚預識龍顏之表時惟巨慝構乃屬階忘臣以樸忠閔臣以艱拙潛坐黨人之議嗣罹醜地之遷萬里去邦朝非謀夕一身許國死且猶生冀其虺毒斲臂而窮獸噬得人而止伏遇皇帝陛下日華升照天德為剛除堯羣凶纂禹舊服垂念投荒之窘亟推修廢之仁罷解驚羅洗除痕注頻更屏守復拜臺司而臣壯以懼銷氣為憂耗傷禽墮于虛引仆木衰於望秋再

奉疇咨訖無云補果連他坐上素羹章言盈外庭罰有
平典而陛下止收丞相之印尚進司寇之曹始命為藩
遽令回節改升祕殿之職留待西清之筵當責推恩在
尤逃悔悉排公議曲暢宸慈斯蓋丕冒好生清衷念舊
將收後效特濟餘齡謹當澡雪煩襟激昂懦節昏瞳寢
濁尚能讀夫九邱病骨已銷敢自疲於三陌惟心內誓
有殞為酬

代張屯田兗州謝上表

臣某言昨蒙恩差臣知兗州軍州兼管內勸農事即于某月某日到任訖初違北闕出領東藩千里而遙萬夫為長即宣寬詔用慰斯民竊念臣門素地寒器朽識褊陶師儒而有漸苦扞格以無成逮事先朝已參寧定親逢下武繼被采收有皆短之五能乏至愚之一得蒞官未效滿歲輒遷比濫使輶獲提京邑式瞻周道慶在隲之有華祇率漢條期懇田之可問雖希盡瘁寧厭用多合首汰沙用懲竊祿伏蒙皇帝陛下芾然善養豁爾兼

容山有疾以務藏日容光而必照黜幽未寘疎渥更優
頒禮上臺假麾廣魯伏况量衡所協近經虞后之巡壤
賦有差悉載夏家之貢禪問在望儒泗成風家被復除
人知廉愧謹當奉揚成訓昭體至仁舉燭解琴冀動咨
於典訓摠苗傷錦敢徵罪於官刑淪髓在茲析肝何喻

代轉戶侍充職知廬州謝表

宋陳堯佐字希元歷
官翰林學士參知政

事明道二年以戶
部侍郎知廬州

臣某言伏奉制命特授臣戶部侍郎充龍圖閣學士知

廬州軍州兼管內勸農事者寵加無狀願出所涯渙汗不收捫心增悞竊念臣憊煩材品扞格藝文早汙署堂繼持從橐慶親逢之在旦託私蓋以如天既負又乘宜疏而裨書思朝簿絕念夫均勞計過夜分未知其寡悔且復稟生多病中年早衰目苦眊昏氣多輜結惛惛臂肉計日減分種種頭毛從衰得白或卧廬請告或伏枕彌旬極昧死以陳章願出藩而寬疾洪惟慘愛終爾依違如臣至愚自卜已審非不知高門之地邇帝所之凝

嚴承明之廬為仕塗之極摯而命奇智困福過災生跛
倚不足以相儀忘誤無容而置對起訖還卧自取晉臣
之嗤否終弗傾誰任義文之外罔虞三瀆頻紊四聰祈
天必從誓恩不朽伏蒙皇帝陛下深仁念舊大度匿瑕
收電霽威回春振槁潤其尸居之氣察無他惡之腸更
進文昌之貳官尚領河圖之祕禁擇其善地許以再麾
本緣偃息之私更遂便蕃之數臣敢不勉修治體徧諭
上仁循致樂蘇少寬盱眙至於遵宣尼之慎疾訪周氏

之全醫冀及平強再陪訪逮出奉會稽之最非敢告勞
歸成麗正之書誓無私限逢辰論報沒齒為期

代知兗州謝表

臣某言驟違天咫祇率星言趣四牡以載馳戾萬夫而
樹政大東之奧剖簡為榮竊念臣智本顓蒙數惟奇隻
早辱縣官之使遂代上農之耕曾乏所長仰裨乃事支
離有素居延受粟之譏樸樸而生久玷能官之詠連更
郡寄再覲宸嚴清明會朝預陪於有著好醜必上令盡

其所言復加五品之章以示百城之寵洪惟幸會賈絕
擬倫此蓋陛下仁篤好生惠深藏疾扶盧直鑄各盡於
有能益海附山或取於微益俾茲瘁野尚玷寵私矧汶
上之名藩本魯初之奧壤承平在旦富庶敦風臣敢不
律乃最軀撫茲善俗中庸厥履日夜以思束矢鈞金體
欽哉於庶獄杏華莒葉誠勤止於斯民少寬當宸之勞
上答包荒之賜

代謝加勲表

臣某言今月日本州進奏院遞到官誥一通敕牒一道
蒙恩加臣上騎都尉餘如故仍放朝謝者神壇三襲肅
陳天燎之儀溫詔十行誕布王絲之澤渙汗式均於近
署策勲爰及於具寮對昊命以知榮循官箴而增惕竊
以寘行之寵遠自於周班疏爵之勲近從於唐制皆以
增隆分數徽序國章慎康服以酬勞靡賓賢而分職聿
當亨會必副與僉如臣者尤治無聞曠僚滋久超肩牆
而展案貳符守以出藩徒堅斷斷之心未洽優優之政

幸屬國家撫重雍之景運展甚盛之帝容即大次以告
成御琬輿而飲至天闈第賞允示於推仁侯服均禧誤
叨於進律顧光華之曲被實俯僂以無從謬玷寵靈彌
喧物議敢不劬勤職業率勵典獎夙夜在公謹守舜俞
之訓彌縫其闕免招漢習之譏

代薛資政謝許住京養疾表

宋薛奎字宿藝累官
參知政事明道二年

十月以疾罷
為資政學士

臣某言近以久疾陳乞外任伏奉批答且令在京就醫

藥將治者卧疾彌年未諳有損乞藩上奏冀獲自私狀
危懇以不支枉溫辭之垂答深仁下濟槁質重蘇竊念
臣偶籍嘉亨入陪丞弼師師之訓無補官箴兩兩之符
屢干臺象緣食浮而聆謗遂福過而延災肺腑為疴踵
息交臂獲解中樞之任尚叨祕殿之名特免造朝以便
藏疾官無三最亟煩予告之恩祿乃百廛居畏無功之
責綿跨涼燠嘗備苦甘前愈未臻後劇還甚竊謂已疲
之馬難望君軒之前遂枯之根決無犧器之望輒祈近

服庶續殘齡蓋且不得而去邦非無情於戀主孤心如
隕危涕自零陛下大惠不貲至誠時克曲矜舊物昭布
大言慮下國之既遙乏上池而取效俾留神縣庶就嘉
醫屈原之魄九升招還有漸魏犢之病三百距躍可期
獲延朝菌之餘誓畢夕冰之報

代李副樞生日謝賜羊酒米麪表

集李諱為樞密
副使在明道二

年四
月

危心締感永念於劬勞多物有容茂昭於慶賜夫何庸

金匱要略卷之四
卷四十一
惜有玷寵私竊念臣偶以薄材累更煩使入佐本兵之地
豈逢偃節之期恩有墜而無酬力不能而將止聖猷
天縱大度山藏弗暴所疵冀收云補推御人之為大記
射矢之有初寵以稻粳申之醪餼况臣乳乳在疚齟齬
叨榮懷顧復以滋深荷匪頌之尤異竊同騷客私有託
於庚辰何幸絳師上乃知於甲子惟內捫於肺腑冀匪
懈於仕塗獲報萬分無忘九殞

代鄭公謝生日賜牲餼表

臣某言伏蒙聖慈以臣生日特降詔書賜臣羊麪者至
仁垂眷多物分頒副中詔以申褒來王人而臨諭省恩
尤渥被貺滋慚竊念臣夙以羈孱邁於熙盛比塵皇揆
參決政樞仰含天覆之容未責人言之刺矧惟生旦自
志私懷不謂上聞更煩眷記遽斥醪牽之厚且沾稻穡
之甘充衍家饗光華里旅糾宗示惠雖感於已孤續老
蒙慈遂同於再造此蓋皇帝陛下待臣隣而有體崇予
錫之載蕃雖值謏才亦容異數追念親懷之遠仰叨聖

養之隆俾艾不誣歸醕有所

代集賢相公謝生日賜物表二首

沃若使華奉將明命賁然賜品森照私庭荷鴻造之顧
存撫煩悰而震抃竊念臣親逢千載逮事兩朝再辱營
求訖無報稱聖神天縱憲度日躋曷嘗不心懽於開陳
之端汗流於主臣之對方虞隳職仰玷代工乃蒙皇帝
陛下俯諒謏材特恢大度推邇臣之同體記生日之有
初橫錫餼醪紛頒管笥佐庖為具出乃眷之茂恩列鼎

分滋結所生之深感內期中瘁少答涓埃

上恩躡等多物陳庭俾同氣以奉將實有家之深幸竊
念臣誠微練達資適會享先帝察無他腸擢充汝弼功
非可記寵已不貲屬兼調護之臣預識徇齊之表伏蒙
皇帝陛下曲憐舊物再叙上司曾是憇冥闕然風采平
章百姓則罔助堯功鎮撫四夷則但循漢法託於大度
偶及寡尤敢圖乃聖之仁垂念所生之旦斥華紱於內
府分精器於尚方乘馬權奇衢鞍熠煜侑其私慶續乃

衰年竊比絳人僅知於甲子本漸周輔弗紀於崧高銜有昊之至慈啟孤臣之再造誓於九殞仰答萬分

代生日謝賜羊酒米麪等表

臣某言禮本自生劬勞之常感寵加多物錫予之至慈荷居所之頒分動私門之距躍竊念臣系承單素仕邁亨嘉緣樸移忠因儒儒武進貳惟幾之地間聞甚衆之言舛命自嬰親闈見背亟蒙勉詔還攝攸司楚臣離散之魂胡能立事漢后回容之庇居不為瑕屬震肅之初

長動沈縣之深嘆陔蘭隕露遂無欲報之期門矢生塵
長結已孤之想敢謂陛下俯矜餘息申獎有家雖當惕
景之餘亦侈陳庭之賜仰緣滋旨更極摧號收景西山
還齡司命不家而食頓荷於扶衰有踵可摩敢忘於陳
力苦言增叨感賜奚宣

代參政生日詔書賜牲餼謝表

臣某言伏蒙聖慈以臣生日特降詔書賜臣羊酒米麪
者驛使紆駢締封墜眷旅增錫品紛照家庭銜惠靡貲

捫心知愧竊念臣叨陪宰政再留歲躔庶務所縈淺謀
不輯託包荒於天地未罷賜於邱園載育在辰早孤集
感方廣緣寵例推行恩華分碩畜於牧人沾美醪於酒
正脣體珍潔導米粢甘榮所自生私訂累茵之嘆俾於
爾艾更蒙全領之慈此蓋伏遇皇帝陛下道茂養賢詔
深愛禮忘其愚短假乃褒優佐家食以屬厭闔宗盟而
循省誓勤夙夜歸報涓分

景文集卷四十